

## CONVERSA CON RAMON VARELA

# A CHUVIA ACIDA: INVESTIGACION PENALIZADA NA GALIZA



Ramón  
Varela

O ecoloxismo é acusado unha e outra vez de falta de rigor científico nas suas análises da realidade, principalmente cando hai en xogo fortes capitais, como é o caso das inversións multimillonarias para a instalación de diversas industrias que se destacan polo seu impacto ambiental. A polémica é antiga, pero coa elaboración do Plan Forestal chegou-se mesmo a teorizar sobre elo, dedicando-lle un capítulo do Plan a analisar a influéncia perniciosa do ecoloxismo sobre a conciencia cidadana e deseñando actuacións encamiñadas a contrarestar tal influéncia. Os autores de tales teses son na maioría das veces sesudos Catedráticos e Doutores que se presentan como o estandarte da Ciencia. Na sua análise, os ecoloxistas son persoas desinformadas, resentidas, que sempre están a dicer non ao avance tecnolóxico e científico. Saben do apoio e da participación de investigadores e científicos no movemento ecoloxista, sen outro interés que a divulgación da verdade, pero tal cousa nunca chegarán a recoñecé-la. O asunto sae-se destes cauces cando estudos sérios e comprometidos realizados por membros do movemento ecoloxista ou por investigadores consecuentes contradicen flagrantemente os postulados establecidos. Desta forma pode-

riamo-nos referir á polémica surxida en torno á Tese de Ramón Varela, presidente de Adega, sobre a chuvia ácida nas comarcas de A Estrada e Ames. Os directores viron-se na obligación de retirar o traballo da Universidade de Santiago, para mais de dous anos depois de ser presentado, poder ser lido na Autónoma de Madrid, onde recibiría a máxima calificación de Apto cum laude. Cerna conversou recentemente con Ramón Varela sobre esta cuestión e a problemática da chuvia ácida na Galiza.

**C. Celulosas, nucleares, sector forestal... o seu labor de análise científica e da realidade galega estivo sempre ao servizo do ecoloxismo e da defensa ambiental?**

**R.V.** Nos anos 70 dá-se na Galiza unha situación de profundo descoñecemento do meio natural galego, e de falta de estudos sobre a nosa realidade. É nesta situación cando nos caen toda unha serie de proxectos industriais de duvidoso interese económico e un grande impacto ambiental sobre o meio natural, tanto de contaminación como de esquilmación de recursos. É o caso dos seis proxectos de celulosas a instalar nas rias galegas, da proposta de central nuclear para xove, das expropiacións para as minas de lignito que habían de alimentar as centrais térmicas, etc.

Nese contexto nace Adega cos obxectivos precisos de clarificar en que consisten tales proxectos e valorar que impacto podían ter no medio, vendo-nos na obligación de estudar tanto os aspectos positivos como os negativos. O meu traballo encadra-se neste marco. Hai muita xente que considera estas iniciati-



vas como unha alternativa de desenvolvemento, polos postos de traballo que poden dar, pero o noso enfoque consiste en profundizar mais e analisar os perigos que encerra unha central nuclear, sexan as emisións de radioactividade, os residuos, ou os accidentes. Os feitos posteriores darian-nos a razón.

Mención a parte merece o meu traballo en relación co campo forestal. Neses anos xestou-se, e aínda hoxe está vixente, unha ampla corrente que vai no camiño de aceptar piñeiro e eucaliptos como algo necesario para o noso país. Era necesario analisar cal era o impacto que podía ocasionar a introdución masiva destas especies. Esta problemática estava mais ligada ao mundo das ciencias naturais, e por tanto á miña profesión como biólogo. Non se podía estar impasible ...

O meu acercamento a estes estudos deve-se a varios factores. Primeiro, a que profesionalmente estou ligado ao mundo da bioloxía e ao mundo das ciencias naturais. En segundo lugar, á preocupación que todo cidadán normal ten cando vé que existe unha serie de problemáticas no seu país, muitas veces sen abordar. Considero tamén que cada un de nós pode aportar un grao de area, diso se trata, ao coñecimento de tal problemática e ás posíveis alternativas de solución.

**C. Co tema da chuvia ácida vostede introduce-se no eido da investigación experimental e de campo. ¿Era imprescindível?**

**R.V.** Era absolutamente imprescindible para demostrar a existéncia de chuvia ácida no noso país. Unha cousa eran os indicios que existian, mui no-

táveis, ou as anécdotas, como cando un labrego conta a sua visión da problemática no seu bosque, ou o feito de que lle morrían as plantas por culpa das névoas. Aí estaba o coñecimento empírico que a xente tén do problema.


Pero a nivel científico, é necesaria a utilización do método científico para o coñecimento da realidade. Entón é cando se planifica un traballo, centrando-o sobre todo no estudo da contaminación atmosférica a través da precipitación, en base a 10 parámetros químicos. Plantea-se tamén un estudo do movemento das masas de ar mediante radiosondeos, e estuda-se a situación do bosque de coníferas, que son xustamente as especies mais sensíveis a contaminación.

É necesario analisar os resultados de todo este traballo, centrado nestes tres aspectos, para poder discernir se existe ou non unha chuvia ácida. A miña Tese non fai senón confirmar ese coñecemento empírico que os labregos tiñan das consecuencias da contaminación, o que o povo xá sabía. Pero a nivel de superestructuras, como é o caso da Universidade, semella que estava pechada a meter-se no tema, e determinar se realmente existía ou non chuvia ácida.

Eu planteei realizar o estudo no Dpto. de Ecoloxía. Pero a realidade é que en toda a Universidade no ano 1986 non había ningun que traballara nen unha chuvia ácida, nen no eido mais xenérico da contaminación atmosférica. Había, iso si, algúna aproximación ao tema, como no caso do Dpto. de Botánica co estudo de liques bioindicadores en cidades como A Coruña, é algún outro aspecto parcial noutros departamentos.

**C. Claramente este estudo viña a cobrir un valeiro existente. ¿Como se pode explicar a polémica que sucedeu a presentación do seu traballo?**

**R.V.** En primeiro lugar, o método científico, sendo único, permite diferentes formas de enfrentar-se a un problema. Non é o mesmo un problema de edafoloxía, de ecoloxía de zonas húmidas, que un traballo de atmósfera. For-



malmente, da-se un descoñecimento do tema por parte dos alegantes, que non entenden as metodoloxías que se aplican a estes estudos, pretendendo valora-las desde metodoloxías que estudan parcialmente o problema.

Pero ademais existen os intereses dun grupo de investigadores que non só traballan para Endesa, senón que membros do grupo participaron na elaboración do Estudo de Impacto Ambiental para Eurogalicia Forestal, vendo-se na necesidade de modificá-lo a raiz das alegacións que Adega lles presentou por tres veces seguidas. Tamén traballaron para a instalación dunha incineradora de lixo en Vigo, a que no seu dia se opuxo Adega. En declaracións á prensa, membros deste grupo de investigadores teñen afirmado que a problemática da ría de Pontevedra non era tan grave, e que non existen metais pesados na ría, cando mesmo por investigacións do profesor Bermejo se coñece que o mexilón, a ameixa e outros moluscos presentan elevadas concentracións de mercúrio.

En definitiva, que non traballan por e para Galiza, como dicen, senón que traballan por diñeiro e para as empresas, para unhas determinadas empresas, importando-lles ben pouco o meio ambiente galego. Hai evidentemente unhos intereses económicos concretos.

**C. Ao que ti comentas poderiamos engadir o feito de que algún dos alegantes teña participado na elaboración do Proxecto de RSU da Xunta (incineración), ou na elaboración dun informe que recomendou o peche da**

**planta de compost de Mougá. ¿Qué aspectos destacavan mais nas alegacións presentadas?**


**R.V.** Referin-me antes á diferente forma de entender por parte dos alegantes as metodoloxías de investigación. Pero ademais, a polémica saiu-se do ámbito puramente científico, pois as alegacións eran vexatorias para a miña persoa, tanto que levarian a calquera doutorando a tirar co traballo nunha papeleira. Dicer que o traballo non é orixinal (onde hai outra tese doutoral sobre este tema na Galiza ou no Estado Español?), dicer que non sequera servia para tesina, ou que non era digno de ser admitido pola Universidade de Santiago. O interés do grupo dos alegantes para impedir a leitura da tese era tal, que unha mesma persoa fixo duas alegacións distintas, unha en grupo e outra individual. Todo isto é algo mui forte, pero infundado, e así se demostrou ao ser lida a tese na Universidade autónoma de Madrid.

A retirada da Tese da Universidade de Santiago foi a única solución para desbloquear a situación de parálise na que se atopava, tras mais de dez meses de «silencio administrativo». Obviamente, como calquera pode comprobar, o prestíxio da Autonoma está ben por acima da de Santiago. Os alegantes non querían baixo ningún concepto que esta tese se lese na Universidade, senón deixarían que un Tribunal a xulgase en Santiago.

## O PROBLEMA DA CHUVIA ACIDA


**C. ¿Qué opinión che merece a situación xeral na Galiza?**

**R.V.** Recentemente, unha publicación da CE, do ano 1993, indicava que perto do 70% do territorio galego tiña sobrepassado a carga crítica de dióxido de enxofre que o solo pode admitir. O noso medio é mui sensible, e contando cun grau de industrialización mui inferior, podemos chegar a unha situación mais



Cargas críticas de enxofre en Europa. Arriba: situación no ano 1990; abaixo: situación prevista para o 2005, no caso de cumpriren-se os actuais obxectivos comunitarios de redución, cifrados no 86% das emisións globais.

Fonte: Acid News, nº 2, Abril, 1993



Actualmente na Galiza exceden-se as cargas críticas en mais dun 90%, situando-se todo o norte da provincia de A Coruña a un nivel semellante ao dos países mais industrializados (Alemaña, por exemplo). A reducción prevista para Galiza é inferior a media, o que levará a que unha boa parte o territorio galego se ache entre o 4% da superficie europea que depois de 2005 suportará cargas de enxofre superiores ás críticas.

grave ca de moitos dos países mui industrializados.

O 96% do dióxido de enxofre que se emite na Galiza sae das térmicas de Meirama e As Pontes. Queima-se lignito, que definen como carbón con algo de enxofre, pero eu diría, recollendo as palabras de Mariano Seoane Calvo, que se trata de enxofre con muito carbón. Nunha palabra, hai que centrar a atención no enxofre, pois os danos causados por este están a superar os benefícios.

#### C. ¿Predominan os efectos episódicos, de carácter intenso, ou é más ben un problema de contaminación a longo prazo?

**R.V.** O problema dá-se por episódios concretos, mais intensos na primavera. Pero ao longo de todo o ano dá-se unha contaminación crónica. Aínda que as duas son importantes, na primavera, nun curto período de tempo, pode chegar a depositar-se mais da terceira parte do total. É un período mui preocupante a este respecto.

A contaminación crónica significa

que a acidez e a presencia de sulfatos, ou de óxidos de nitróxeno, está mui por acima dos niveis de fondo (relativos a niveis mariños) durante todo o ano. O meu estudo está centrado nunha zona onde os ventos dominantes que proceden das térmicas constituen tan só o 9,6% dos ventos, cunha precipitación superior ao 20%. Por ello, non é a zona onde a chuvia ácida se ha de mostrar mais acusada. Os ventos dominantes na Galiza son do Oeste e Suroeste, de forma que a maior parte das emisións ácidas veránse arrastadas para o norte das provincias de A Coruña e Lugo. Aí hai estudos que indican unha elevada corrosividade atmosférica, e pH ácidos en moitos municipios. As consecuencias xá están aí, coñecendo-se casos de névoas ácidas que teñen afectado gravemente a zonas de Vilares e Guitiriz.

**C. ¿Cales son as solucións posíves e as actuacións no futuro imediato?**

**R.V.** En Europa está-se a enfrentar o problema da chuvia ácida en tres fases, con obxectivos de redución para os anos 93, 98 e 2003. Paises como Francia e Alemaña van a reducir as emisións en porcentaxes do 70% para o ano 2003, mentres que o Estado Español, en función da negociación de adhesión a CE, só as reducirá nun 40%. Isto perjudica seriamente a Galiza, pois a chuvia ácida non afecta aos «Estados» senon a partes do territorio mui concretas, e xa vimos que na Galiza se están a sobrepassar as cargas críticas. As reducións na Galiza deverian ir por diante das do Estado Español.

Polo demais, trata-se de reducións graduais que non conlevan reducións mais fortes naqueles meses en que o problema da chuvia ácida é mais acuciante. Alternativas técnicas existen varias, podendo actuar antes da combustión, durante ou depois da combustión (ver dossier no Cerna nº 7). Unha medida importante seria a aplicación do canon de emisións, que se ten introducido en países como Noruega e Suécia, que grava ás emisións que se producen, forzando ás industrias a modificar os procesos. Na Galiza, eses canons deverian ir destinados ademais a reparar o dano ambiental xá causado. ■